

SA MISSA

Cantu poto, cun rima novella,

Sa Santa Missa cherzo onorare,

Assimizo sa Rughe a s'istella

Chi sa clesia tet illuminare.

A pensare sa Missa, tantu bella,

Cando devotu la devo iscultare,

Imbenujadu in d'una cappella

Cun veru coro si devet pregare.

Penso sa Missa virtuosa tanta:

Curat su male sena meighina,

Cando devota l'iscurtat sa zente

Rendet onore a sa manu Divina,

Oppuru onorat santu o santa,

Ma est tottu sa manu ptente.

Trainu

A MARIA 'E SU REMEDIU

Maria, ses de chelu sa Signora,
De terra pure istella preziosa,
Sa mamma de Cristos vara isposa,
E in su mundu s'unica aurora.

Già chi ses de Gesus genitora
Salvanos in cust'era burrascosa,
Tue che una mamma piedosa
E perla Divina puru ancora.

De chelu ses istella mattutina,
E de sa terra rosa plus amena,
Su populu, unidu, t'est costante.

Ave Maria, istella Divina,
Ave Maria, de grassias plena,
Cunforta custu populu festante.

Trainu

SU CAMPUSANTU

Ses calmu e serenu campusantu,
Serras sos ossos de s'esser umanu,
Partint tristos piehos de piantu
A s'ordine chi dat su Soberanu.

S'ingrata terra chi seppellit tantu
Umiliadu d'ogni cristianu;
Dan' in su cipressu amenu cantu,
Sos puzzones a sero e a manzanu.

Logu Santu Divinu e beneitu
Serras sos ossos de s'umanidade,
A bi pensare attristet su coro.

Deo lu giamo tristu caru litu
Ca b'andant tottu sena falsidade,
Che logu de ~~rip~~ettu lu onoro.

Trainu